

## Yn y Rhifyn Hwn:

- Tystysgrifau Kerbcraft
- Rhoi Prawf ar Wybodaeth am Ddiogelwch ar y Ffyrdd
- Athro wedi Ymddeol yn Mentro i fyd Diogelwch ar y Ffyrdd
- Ymgynghori â'r Cyhoedd ynghylch Dysgu Gyrru
- Dadorchuddio efelychydd beic modur
- 'TGAU mewn Gyrru' ar y gweill
- Diogelwch ar y Ffyrdd yn ein Dinasoedd
- Adnodd am ddim ynghylch Saesneg fel ail iaith
- Lansio DVD Cymorth Hyfforddi Beicio Modur gan y DSA
- Marwolaethau Pobl Hŷn ar y Ffyrdd
- Hyfforddiant Teithio: Cyfnodau Allweddol 3 a 4
- Gyrwyr sy'n Methu â Diogelu Plant sy'n Teithio

## Tystysgrifau Kerbcraft



Dysgwyr Kerbcraft yn y seremoni gyflwyno. Hefyd yn y llun mae Karl Napieralla, Cyfarwyddwr Addysg (chwith), y Cynghorydd Arwyn Woolcock (de) a'r Rheolwraig Diogelwch ar y Ffyrdd, Joy Smith (de)

**Mae gwirfoddolwyr ymroddedig yng Nghastell-nedd Port Talbot sy'n helpu pobl ifanc i ddysgu am beryglon y ffyrdd wedi bod wrthi'n dysgu drostynt eu hunain. Bellach, maent wedi cael tystysgrifau ar ôl cwblhau'n llwyddiannus y cynllun hyfforddi unigryw a ddatblygwyd yn y fwrdeistref sirol.**

Mae'r 15 o wirfoddolwyr wedi bod yn astudio'r hyn sy'n cyfateb i NVQ mewn Sgiliau Plant sy'n Gerddwyr. Datblygwyd y cymhwyster gan Gydlynnydd Kerbcraft ar y cyd â Rhwydwaith y Coleg Agored a Gwasanaeth Dysgu Gydol Oes Castell-nedd a Phort Talbot. Dyma'r unig un o'i fath yng Nghymru.

Mae cynllun Kerbcraft ar waith yng Nghastell-nedd Port Talbot ers chwe blynedd. Ar hyn o bryd, mae 29 ysgol yn cymryd rhan ynddo a'r nod yw rhoi hyfforddiant ar y ffordd i blant 5-7 oed.

Oherwydd eu llwyddiant gyda'r plant, cafodd y gwirfoddolwyr gyfle i ennill y cymhwyster ac maen nhw'n awr wedi cael eu tystysgrifau.

Meddai'r Rheolwraig Diogelwch ar y Ffyrdd, Joy Smith: "Rydyn ni wrth ein bodd â champ ein gwirfoddolwyr. "Byddan nhw'n rhoi o'u hamser rhydd i hyfforddi'n pobl ifanc fregus, ac yn hwyliog a hyderus eu hagwedd beth bynnag fydd y tywydd. Mae'r cymwysterau maen nhw wedi'u sicrhau, a'r rheiny'n rhai a gydnabyddir ledled y wlad, yn cyfoethogi rhagor ar ein cynllun Kerbcraft ac yn wobwr fach iddyn nhw am eu hymroddiad a'u gwaith caled."

## Rhoi Prawf ar Wybodaeth am Ddiogelwch ar y Ffyrdd



**Erbyn hyn, Ysgol Gynradd Lansdowne, pencampwr y Cwis Diogelwch ar y Ffyrdd i Ysgolion Caerdydd, yw pencampwr Cwis Ysgolion Cynradd De Cymru yn yr un maes.**

Cynhaliwyd y rownd derfynol ym Mhencadlys Heddlu'r De ym Mhen-y-bont ar Ogrwr ddydd Gwener 20fed Mehefin ac fe gurodd y tîm bum ysgol a oedd yn cynrychioli awdurdodau lleol ledled y de. Cydlynir y gystadleuaeth flynyddol hon gan Heddlu'r De ac fe'i noddir gan Lion Laboratories.

## Athro wedi Ymddeol yn Mentro i fyd Diogelwch ar y Ffyrdd

**Diogelwch ar y Ffyrdd – Adnodd Newydd mewn Cerddoriaeth i Flwyddyn 2. Efallai fod Cerddoriaeth a Diogelwch ar y Ffyrdd yn bartneriaid rhyfedd, ond darganfu athrawon yn Sir Fynwy yn ddiweddar fod y cynllun newydd ac arloesol hwn wedi taro tant, ac wedi taro deuddeg!**



What Mae'r cynllun gwaith a luniwyd ar gyfer y disgyblion yn Ysgol Gynradd Thornwell yng Nghas-gwent wedi'i ehangu a'i ddatblygu'n adnodd gwerthfawr i athrawon.

Yn ddiweddar, bu athrawon o ysgolion cynradd yn ne Sir Fynwy ar gwrs hyfforddi mewn-swydd i ddysgu plethu negeseuon sylfaenol am ddiogelwch ar y ffyrdd i dymor o wersi cerddoriaeth. Dyfeisiwyd y cynllun gan Bob Young, a arferai fod yn athro yn Ysgol Gynradd Thornwell ond sydd bellach wedi "ymddeol".

Bellach, caiff y cynllun gwaith y gwnaeth ei lunio a'i gyflwyno ei ddefnyddio mewn ysgolion yn Sir Fynwy. Yr oedd sylwadau cadarnhaol y rhai a ddilynodd y cwrs yn cyfiawnhau'r holl waith o baratoi'r cynllun.

"Y draethu'n dda a'r hyfforddi'n fywiog. Roedd yr holl syniadau, gwybodaeth a gweithgareddau'n ddefnyddiol. Da gweld sut y caiff gweithgareddau eu defnyddio gyda dosbarth Blwyddyn 2. Ymatebion a chyfranogi gwyach." Miriam Buchan, Pennaeth Cynorthwyol ac Athrawes Blwyddyn 5 yn Ysgol Gynradd Drenewydd Gelli-farch.

"Roedd y cynnwys cerddorol yn cyd-fynd yn hwylus â'r agwedd ar ddiogelwch ar y ffyrdd. Doedd dim teimlad o ieuo'r anghymarus." Marc Williams, Cydlynnydd Cerddoriaeth Ysgol Gynradd Thornwell.

## Ymgynghori â'r Cyhoedd ynghylch Dysgu Gyrru



**Mae'r Llywodraeth (y DSA) wedi cyhoeddi Papur Ymgynghorol, o'r enw Learning to Drive, sy'n cyflwyno cynigion ar gyfer adolygiad mawr o'r ffordd y dysgwyr ni yrru, yn esbonio pam y mae'r newid yn bwysig ac yn disgrifio ffyrdd posibl o gynnwys y cyhoedd yn y broses.**

### Angen newid

Gan fod nifer y bobl sydd wedi'u lladd neu wedi'u hanafu ar ffyrdd Prydain wedi gostwng un rhan o dair dros y deg mlynedd diwethaf, mae teithio ar ffyrdd Prydain yn fwy diogel na gwneud hynny bron yn unman arall yn y byd. Ond mae ffordd bell i fynd o hyd. Dyma amcangyfrif yr arbenigwyr:

Lladdwyd dros dri chant o yrwyr a oedd newydd lwyddo yn eu prawf, a'u teithwyr, mewn damweiniau yn 2006.

Gyrwyr sydd newydd lwyddo yn eu prawf, a'u teithwyr, yw un o bob pump sy'n marw mewn ceir.

### Y newidiadau sy'n cael eu cynnig

Ar sail ein hymchwil, mae'r Papur Ymgynghorol Learning to Drive yn amlinellu'r hyn yr hoffai pobl ei weld mewn rhaglen newydd o hyfforddi, profi a gyrru. Hoffem ddarparu:

Gwell prawf gyrru

Gwell proses ddysgu

Gwell gwybodaeth am hyfforddwyr a gwell hyfforddiant iddynt

Dewisiadau pellach o ran dysgu ac ennill cymwysterau

### Beth yw'ch barn chi?

Er mwyn i'r cyhoedd gael popeth y bydd arnynt ei angen i ymuno â'r ymgynghoriad, rydym wedi cyhoeddi amrywiaeth mawr o wybodaeth ac wedi creu amryw o ffyrdd i chi gyflwyno'ch sylwadau. Cewch ddweud eich dweud o hyn tan 8 Medi 2008 (pan ddaw'r ymgynghori â'r cyhoedd i ben).

Gwefan arbennig yr ymgynghoriad Learning to Drive: <http://dsa.gov.uk/learningtodrive>

Papur Ymgynghorol Learning to Drive: [www.dsa.gov.uk/consultation](http://www.dsa.gov.uk/consultation)



**Mae ymchwilwyr ym Mhrydain wedi dadorchuddio efelychydd beic modur. Dywed ei grewyr y caiff y peiriant ei ddefnyddio i fonitro ymddygiad beicwyr. Bydd hynny'n arwain at ddatblygiadau ym myd diogelwch ar y ffyrdd ac ym myd dylunio beiciau.**

Dr Alex Stedmon o Brifysgol Nottingham oedd arweinydd y prosiect. Dywed mai'r peiriant hwn yw'r cyntaf o'i fath a'i fod yn cyfuno elfennau na welwyd mohonynt mewn efelychwyr o'r blaen.

Meddai Dr Stedmon: "Bydd yn gyfleuster ymchwil gwych. Dyma'r efelychydd symudol maint-llawn cyntaf sy'n gysylltiedig â sgrin taflunydd a meddalwedd pwrpasol. Does dim rhaidd i ni boeni am ddiogelwch y beicwyr ar yr efelychydd, nac am y tywydd (am fod y cyfan dan do)."

Cysylltir y beic – sydd wedi'i adeiladu ar ffrâm Triumph Daytona go iawn – â meddalwedd a arferai gael ei defnyddio mewn efelychwyr ceir. Bu tîm o bedwar myfyriwr yn gweithio ar y prosiect i gyfuno'r beic â'r meddalwedd. Mae pedwar teclyn niwmatig yn gwneud i'r beic bwyso i'r dde ac i'r chwith. O flaen y beic mae sgrin fawr yn dangos amgylchedd ffordd sy'n cynnwys traffig.

[Gweld y fideo](#)

### 'TGAU mewn Gyrru' ar y gweill

**Mae corff o'r enw a2om wrthi'n datblygu BTEC mewn Gwyddor Gyrru (TGAU) sef 'cymhwyster academiaidd a galwedigaethol cyntaf y byd i'r rhai sy'n dysgu gyrru'.**

Mae'r cwrs yn cynnig ffordd i hyfforddwyr a myfyrwyr roi sylw i'r sgiliau corfforol sydd ynghlwm wrth ddysgu gyrru a llwyddo yn y prawf gyrru, a pharatoi'r dysgwyr i yrru'n fwy diogel ar ôl hynny.



Cyflwynir y cymhwyster newydd gan ADIs, ac mae a2om yn darparu rhaglen o ddiwrnodau hyfforddi ar ei gyfer.

Mae'r cwrs hefyd yn cynnwys hyfforddiant wedi'r prawf, sef datblygu profiadau'r myfyrwyr ar y ffyrdd, ac yn rhoi sylw i gyfrifoldebau bod â thrwydded, a thechnegau rheoli risg.

Meddai Adrian Walsh, cyfarwyddwr RoadSafe: "Gan fod gallu gyrru yn llwybr pwysig at gael swydd, dylai dysgu gyrru fod yn rhan o'n cyfundrefn addysg. Dyma ddatblygiad arloesol fydd yn rhoi cyfle – nad oedd i'w gael o'r blaen – i bobl ifanc."

I gael gwybod rhagor, cysylltwch â [Dave Parkin](#) ar 07894199374, neu ewch i: [www.a2om.com](http://www.a2om.com)

### Diogelwch ar y Ffyrdd yn ein Dinasoedd



**Gan mai nod prosiect uchelgeisiol Ewrop yw arbed 25,000 o fywydau ar ein ffyrdd, diben Diwrnodau Ewropeaidd Diogelwch ar y Ffyrdd yw cynyddu ymwybyddiaeth, rhoi amlygrwydd i'r arferion lleol a'r polisiau Ewropeaidd gorau, a chynnig cyfle i bawb perthnasol weithio i gynyddu rhagor ar ddiogelwch ar y ffyrdd mewn cymuned wirioneddol Ewropeaidd a byd-eang.**

Bydd yr ail ddiwrnod diogelwch ar y ffyrdd, sydd i'w gynnal yn 2008, yn rhoi sylw i bwnc "Diogelwch ar Ffyrdd ein Dinasoedd". Mabwysiadwyd Papur Gwyrdd y Comisiwn, "Towards a new culture for urban mobility", ar 25 Medi 2007 ac ynddo dywedir y gallai un o'r diwrnodau Ewropeaidd nesaf ar ddiogelwch y ffyrdd ganolbwyntio ar ardaloedd trefol. Yn wir, bydd dwy o bob tair damwain ac un o bob tair marwolaeth ar y ffyrdd yn digwydd mewn ardaloedd trefol ac yn effeithio ar ddefnyddwyr mwyaf bregus y ffyrdd.

Cynhelir yr ail ddiwrnod Ewropeaidd ar ddiogelwch ar y ffyrdd ar 13 Hydref 2008. Ym Mharis y cynhelir y prif ddiwyddiad. Yng Nghymru, y gobaith yw cynnal diwyddiadau yng Nghaerdydd, Casnewydd ac Abertawe.

[Darllen Rhagor](#)

**Saesneg fel ail iaith? Adnodd newydd am ddim ynghylch diogelwch ar y ffyrdd**



**Gyda chymorth Adran Diogelwch ar y Ffyrdd yng Nghyngor Dinas Birmingham, a chefnogaeth yr Adran Drafnidiaeth, mae RoSPA wedi datblygu adnodd addysgu newydd ym maes ESOL (Saesneg i Siaradwyr Ieithoedd Eraill) yng Nghyfnod Allweddol 2. Mae'r adnodd yn cynnwys **Canllaw yr Athro a chwe Llyfr Gwaith i Blant**, ac wedi'i gynllunio i ddatblygu sgiliau siarad ac ysgrifennu dysgwyr Saesneg fel ail iaith gan ddefnyddio Diogelwch ar y Ffyrdd yn thema.**

Mae'r ymchwil yn dangos bod plant o gefndir difreintiedig yn fwy tebyg o fod mewn damweiniau ar y ffyrdd - ac yn fwy felly os nad oes gan y plant fawr o Saesneg. Gan mai nod yr adnodd yw helpu i gywiro'r broblem, mae'n cynnwys amryw o eiriau, ymadroddion a negeseuon allweddol diogelwch y ffyrdd mewn **Bengali, Punjabi, Wrdw a Phwyleg** yn ogystal â Saesneg (ond mae modd cynnwys siaradwyr ieithoedd eraill hefyd).

Mae'r llyfrau gwaith ar gael oddi wrth RoSPA fel taflen am ddim tra bydd y stociau ohonyn nhw'n para (MS348 ac MS358), neu i'w llwytho i lawr fel [pdf](#).

Ffoniwch **0121 248 2126** i gael gwybod rhagor.

### Lansio DVD Cymorth Hyfforddi Beicio Modur gan y DSA

Mae'r Asiantaeth Safonau Gyrru (y DSA) newydd lansio DVD hyfforddi swyddogol i feicwyr sydd wedi llwyddo yn eu prawf ac i hyfforddwyr beicwyr modur.

Mae 'Better Biking - the Official DSA Training Aid DVD' yn rhoi cyngor arbenigol ynghylch gwella sgiliau beicwyr ac yn helpu beicwyr sydd wedi llwyddo yn eu prawf i gyrraedd safon y DSA. Gall beicwyr modur gynyddu eu harbenigedd beicio drwy wyllo hyfforddwyr proffesiynol yn hyfforddi beicwyr sydd wedi llwyddo yn eu prawf a thrwy wyllo asesu ar gyfer y Cynllun Uwch-Feicio (yr ERS). Gall hyfforddwyr ddefnyddio'r clipiau a'r dadansoddiad i esbonio'r sgiliau allweddol a'u dangos yn ddiogel ac yn fanwl.

Ar y DVD gwelir y Rhingyll Rick Weaver, prif hyfforddwr uwch-feicio Heddlu Swydd Gaer, yn dangos taith ddelfrydol ym mhob categori o sgil i ddangos y safon o feicio y dylai beiciwr anelu ati.



Yn ogystal â dadansoddi beicwyr, mae'r DVD yn cynnig cyngor awdurdodol ynghylch beiciau, dillad a gwirio beiciau a diogelwch gyda Louise Brady, cyflwynydd Bikes Aloud a'r Isle of Man TT. Mae Brady wrth ei bodd â'r DVD am ei bod yn darparu'n llwyddiannus ar gyfer hyfforddwyr a beicwyr modur sydd wedi llwyddo yn eu prawf: 'Y DVD yw'r cyfrwng perffaith i wella'r rhaglenni hyfforddi a gaiff beicwyr ar ôl llwyddo yn eu prawf, ac mae'n baratoad delfrydol ar gyfer asesiad ERS a allai helpu beicwyr i ostwng cost eu hyswariant.'

Better Biking: the Official DSA Training Aid, ISBN 97801129559 Ewch i [www.tsoshop.co.uk/bike](http://www.tsoshop.co.uk/bike)

### Gostwng Nifer Marwolaethau Pobl Hŷn ar y Ffyrdd




**Cyngor Diogelwch Cludiant Ewrop i 8,260, o leiaf, o bobl 65 oed a throsodd gael eu lladd yn y 27 o wledydd yn yr UE yn 2006.** Er mai person hŷn yw un o bob chwech o boblogaeth Ewrop, mae un o bob pum person sy'n cael eu lladd mewn traffig ar y ffyrdd yn 65 oed a throsodd. Ac

wrth i'r boblogaeth heneiddio, bydd pobl hŷn yn gyfran gynyddol o'r boblogaeth a gallai hynny amharu ar ddatblygiad diogelwch ar y ffyrdd yn y dyfodol. Os bydd cyfraddau risg pobl hŷn ac eraill yn gostwng yr un mor gyflym, mae'n debyg mai person hŷn fydd un o bob tri sy'n marw ar y ffyrdd erbyn 2050. Mae galluogi dinasyddion hŷn i deithio a cherdded yn ddiogel yn haeddu cael sylw arbennig, gan gynnwys ailystyried polisiâu a strategaethau. Dros y degawd diwethaf, **Portiwgal, Israel a Ffrainc** sydd wedi sicrhau'r gostyngiad mwyaf yn nifer marwolaethau pobl hŷn ar y ffyrdd o flwyddyn i flwyddyn.

[Darllen yr adroddiad llawn](#)

**Hyfforddiant Teithio: Cyfnodau Allweddol 3 a 4**



**Po hynaf yw plant, mwyaf tebyg ydyn nhw o farw neu o gael eu hanafu ar y ffyrdd, a thraffig yw un o'r elfennau sy'n lladd fwyaf o blant 12-16 oed ym Mhrydain.**

Dyna'r oedran pryd y bydd plant yn dechrau mentro y tu hwnt i'r cartref a'r ysgol a defnyddio cludiant cyhoeddus ar eu pennau eu hunain. Bydd gwersi hyfforddiant teithio o les i'r myfyrwyr hyn, yn enwedig gan fod teithio ar fysiau a threnau yn gallu bod yn sialens, hyd yn oed i deithwyr profiadol!

Mae'r pecyn hyfforddi hwn yn berthnasol i weithwyr proffesiynol ac i unigolion neu grwpiau eraill sy'n ymddiddori yn lles pobl ifanc – gan gynnwys athrawon, cydlynwyr ABCh, cydlynwyr profiad gwaith, swyddogion diogelwch ar y ffyrdd, cydlynwyr cynlluniau teithio ysgolion, a swyddogion yr heddlu.

Ynndo, mae taflenni gwaith pwrpasol sy'n rhoi sylw i amrywiaeth o bynciau a materion sy'n gysylltiedig â theithio'n annibynnol. Ceir nodiadau addysgu byr hefyd ar gyfer pob taflen waith. Diben y pecyn yw helpu i gyrraedd targedau'r Llywodraeth i gwtogi cryn dipyn, erbyn 2010, ar nifer y bobl sy'n cael eu lladd neu eu hanafu'n ddifrifol mewn damweiniau ar y ffyrdd.

**Cliciwch yma i gael y pdf ar-lein am ddim.**

### **Gyrwyr sy'n Methu â Diogelu Plant sy'n Teithio**



**Mae ymgyrch ledled Ewrop wedi dangos nad yw nifer brawychus o fodurwyr yn gwisgo'u gwregys diogelwch. Trefnwyd Operation Seatbelt gan TISPOL a gwelwyd yr heddlu mewn 22 o wledydd yn Ewrop yn gwirio gyrwyr rhwng Chwefror 18<sup>fed</sup> a 24<sup>ain</sup> 2008.**

Cafwyd nad oedd cyfanswm o 142,209 o ddefnyddwyr ceir yn gwisgo'u gwregys diogelwch er bod hynny'n orfodol yn Ewrop ers 1993.

Meddai Llywydd TISPOL, Adam Briggs: "Mae'r canlyniadau hyn yn peri pryder mawr am ein bod ni'n gwybod mai un o'r bygythiadau mwyaf i fywyd ar y ffyrdd yw methiant y gyrrwr neu'r teithwyr i wisgo'u gwregys diogelwch".

Gan mai teitl ymgyrch TISPOL oedd "Save Your Children. Adults have a choice, children do not", yr oedd yr heddlu'n poeni o weld bod dros 4,000 o blant ymhlith y rhai a oedd heb fod yn gwisgo'u gwregys diogelwch.

"Roedd hi'n bryder mawr gweld bod cynifer o oedolion yn barod i fentro bywydau eu plant", meddai Mr Briggs. "Mae'r ymchwili yn awgrymu bod hyd at 10,000 o bobl yn marw ar ffyrdd Ewrop bob blwyddyn am nad ydyn nhw'n gwisgo gwregys diogelwch – dyna i chi farwolaethau cwbl ddiangen a digon hawdd eu hosgoi."

[Cliciwch yma](#) i weld tabl yr holl ganlyniadau ynghyd â dadansoddiad ohonynt fesul gwlad.

### **Cysylltwch â'r Golygydd**

Hawlfraint © 2008 gan RoSPA Cymru – Cedwir Pob Hawl.

Golygydd: Steve Baker, RoSPA  
[sbaker@rospa.com](mailto:sbaker@rospa.com)

02920 250 600

